

## lis Gnovis

■ **NUUK.** Stop al sfruttament minerari

L'«Inuit Ataqatigiit», ch'al è il partit de Comunitât native dai Inuit, al à vinçût lis votazions in Kalaallit Nunaat/Groelandie, cjapant il 36% dai vòts. Il moviment si è presentât cuntun programe ambientalist ch'al previôt di fermâ il sfruttament minerari de isule, dulà ch'a esistin massimementri jaciments prezios di tieris raris e di urani. Il 90% dai abitants de Groelandie a partegnin al popul Inuit.

■ **MILAN.** Lis scuelis di marilenghe

Ator par dute l'Italie, dal Nord al Sud, a son daûr a multiplicâsi lis «Scuole di lingua madre». Sul stamp di ce che di agns e agnorums si fâs za in mieze Europe, gjenitôrs e clapis culturâls des Comunitâts dai emigrants implantâs chenti a inviî esperiencis didatichis par che lis gnovis etis a conservin lis fevelis dai vons: rumen, arabic, albanês, spagnûl, cinês... Tal numar dal mês di Avrîl, il mensîl d'informazion indipendent «Altrecronia» al fronte la cuistion intal servizi di Ilaria Sesana «A scuola di lingua madre». Fra lis esperiencis plui interessantis, a jentrin lis «Scuole della domenica» des Comunitâts ucrainis de Lombardia, ch'a son stadis studiadis di Paola Bocale de Universitât da l'Insubria, cu la sô coleghe Khrystyna Krychkovska.

■ **PORDENON.** Petizion su la «Rai»

«Se tu vûs ben al Friûl e ae lenghe furlane ti invidi a firmâle e a invidâ i tiei amis e ducj chei che tu puedis a fâ ancjetant»: chel chi al è l'invit firmât di Diego Navarra par compagnâ la petizion «online» ch'è domande a la «Rai» notiziaris informatifs radiofonics e televisifs par furlan; la creazion a Udin di une structure autonome dedicade a radio e television par furlan, cun personâl specializât; risorsis finanziariis e investiments strutturâi; e il potenziament dai uficis di Udin e la ricostituzion dai uficis di Pordenon e di Gurize. Il document, ch'al à par destinatari il president «Rai», Marcello Foa, al pues jessi firmât a la direzion <http://chnq.it/zHPxhNBX>. L'iniziativa e je partide za fa cualchi di par vie che, ai 29 di Avrîl, e scjât la convenzion fra guvier talian e «Rai» su lis trasmissions par furlan.

■ **CORMONS.** Un «Biotop» pal Bosc Disot

Tai uficis regionai che si ocupin de Leç 30/1996 e des Diretivis comunitariis «Habitat» e «Uciei», e je rivade la domande uficiâl par ch'al sedi declarât «Biotop naturâl» dut il Bosc Disot, al ven a stâi dute ch'è grande zone umide, daprûf de Viersa, tal Comon di Cormons. Par agns, dute ch'è zone e je stade une gjave di arzile, ma dopo che l'ativitât di estrazion si è fermade la nature e à tornâi a dâi la volte. Dai 55 etars dal teritori, 11 a son ocupâts di aghis, dulà ch'a cjatin bonstâ 32 speciis di uciei, 9 speciis di anfibis e 9 speciis di mamifars, comprendudis cualitâts cetant raris e protezudis. La propueste di conservazion e di valorizazion e je stade fate di «Legambiente» Gurize.

<b>Miercus 14</b>	S. Valerian martar	<b>Domenie 18</b>	Dedicazion D. Udin
<b>Joibe 15</b>	Ss. Basilisse e Anastasie m.	<b>Lunis 19</b>	S. Eme di Gurk vedue
<b>Vinars 16</b>	S. Bernardete	<b>Martars 20</b>	S. Sare di Antiochie
<b>Sabide 17</b>	S. Nicêt pape	<b>Il timp</b>	Timp umit e cualchi ploie.



**Il soreli**  
Ai 14 al iève aes 6.22  
e al va a mont aes 19.53.



**La lune**  
Ai 20 Prin cuart.

**Il proverbi**  
Confessâsi e no mendâsi  
si va a risc di danâsi.

**Lis voris dal mês**  
Semenait o riplantait ogni sorte di verdure  
e di ortae: sparcs, artiçjocs, cudumars, verzis, ...

## Intun mâr di scovacis

*Lis Glesis talianis  
si confrontin su  
la curie dal teritori*

**S**an Zorç di Noiâr (cun 7), Monfalcon e Davian (cun 5), Gurize e Udin (cun 3), Sacil e Pordenon (cun 2): a son i Cumons piês te note spaventevul e vergognose dai teritoris furlans cul numar plui alt di «Sîts contaminâts», al ven a stâi cun lûcs dulà che i limits di contaminazion e di concentrazione dal incuinament, stabilits tal Decret legislatif 152/2006, a son superâts. Ma la realtât e je plui grivie inmò a cjâlâ la distribuzion dai procediments di bonifiche e lis areis interessadis, provincie par provincie. In chest cás, o vin il Friûl udinês cun 547 procediments, ch'a interessin 9 mil e 731 etars; il Friûl di Soreli amont cun 327 procediments su 3 mil 848 etars; e il Gurizan cun 174 procediments su 653 etars. Il stât de Patrie, te vuere cuintri dal invelenament, al è tamesât te prime edizion dal scandai «Lo stato delle bonifiche dei siti contaminati in Italia: i dati regionali», saltât fûr tal mês di Març, par cure dal Sisteme pe protezion dal ambient di «Ispra», l'Istitût superiôr pe protezion e pe ricerce ambiental. Il studi, cuntun «Focus» di sis façadis dedicadis al Friûl e a Triest, al pues jessi scrutinât tal lûc [www.isprambiente.gov.it/files/2021/publicazioni/rapporti/rapporto\\_bonifiche\\_siti\\_locali.pdf](http://www.isprambiente.gov.it/files/2021/publicazioni/rapporti/rapporto_bonifiche_siti_locali.pdf). Chesta leture e ven a bon par ingrampâ la necessitât de convigne convocade in Acerra des Comissions episcopâls pal Servizi de Carità e de Salût (ch'è je direzude dal Arcivescul di Gurize, monsignôr Carlo Maria Redaelli) e pes Cuistions sociâls, pal Lavôr, pe Justizie e pe Pàs.



Il «Rapporto Ecomafie» al denunzie 166 delits te gjestion des scovacis in Friûl-V. J.

**In Friûl e a Triest,  
a son mil 234  
i Sîts jentrâts  
intun  
procediment  
di bonifiche**

Ai 17 di Avrîl, te citât de Campanie epicentri de «Tiere dai Fûcs», si discorarà su «Custodire le nostre terre. Salute, Ambiente, Lavoro». Lis voris a podaran jessi seguidis tal cjanâl [www.youtube.com/ceipastoraledella salute](http://www.youtube.com/ceipastoraledella salute). «Sis agns daspò de publicazion de Letare encicliche Laudato si' – a marchin i Vescui de «Ce» – al conven verificâ cemût che chel document al à stât colt e comprendût, par rifleti sul impat ch'al à su la salût de int, sul ambient e su lis dinamicis sociâls e dal lavôr il fat di no vè curie dal Creât». In mût speciâl, a son invidâts a la convigne i Vescui e i quartevôs des 78 Glesis talianis che, sul so teritori, a scuegnin confrontâsi cui efets negatîfs e cui procediments intrigôs pal recupar tant dai miârs di Sîts d'interès regionâl (in Friûl e a Triest a 'nd è mil 234) che dai 43 Sîts notâts tal «Programa talian di bonifiche» dai Sîts d'interès statâl («Sin»), ch'al ten cont des contaminazions ambientâls, dal pericul sanitari e dal chivali sociâl. In spiete dal apontament su «Custodire le nostre terre», i Vescui

de Campanie a àn comentât il studi dal Istitût superiôr di Sanitàt ch'al à ricognossût une «part causâl o con causâl dai scovaçars» tai ecès di mortalitàt e d'incidence dai tumôrs te «Tiere dai Fûcs». La colaborazion fra ducj – a bramin i Vescui, sclarint obietifs ch'a tocjin ogni part dal teritori e ogni region – e varès di profundisi in mût di «blocâ ogni ativitât di smaltiment des scovacis ilegâl e fûr control; di bonificâ i Sîts; di svilupâ il cicli virtuôs de gjestion des scovacis; di ativâ un plan pal control epidemiologic permanent; di svilupâ ativitâts educativis par fâ cressi la responsabilitât di ducj».

**Mario Zili**

## Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 17 di Avrîl al cjantarà messe pre' T. Cappellari. Radio Spazio e trasmet sul moment la liturgjie.

Peraulis in dismentie par cure di Mario Martinis❖❖❖ **PUCEFADIE**

s.m. = scansafatiche  
(nome composto dai sostantivi puçe "puzza", dal latino pūtēre "puzzare", e fadie "fatica", forma nominale derivata da fatigare "far morire di stanchezza (utilizzato in origine per gli animali)")  
**Oh ce doi fradis pucefadiis!**  
**Oh che due fratelli scansafatiche!**

❖❖❖ **PULVIN**

s.m. = polvere sottilissima che ogni soffio solleva, polverio  
(dal latino pulvis "polvere")  
**Mi e lât il pulvin tai voi.**  
**La polvere mi è andata negli occhi.**

❖❖❖ **PULÏT**

agg. = curato, lindo, liscio; civile, educato (maggior uso)  
(participio passato di pulire, a sua volta dalla voce dotta latina polīre "rendere liscia, levigata, lucida una superficie; togliere la scabrosità; lucidare")  
**Il to moròs al è dabon ben pulit.**  
**Il tuo fidanzato è davvero curato.**

❖❖❖ **PUIÛL**

s.m. = ballatoio, parte essenziale della casa rustica (dal latino \*podiolum "piccolo poggio", diminutivo di podium "poggio")  
**Taresie si met masse dispès sul puiûl.**  
**Teresa si mette troppo spesso sul ballatoio.**

❖❖❖ **PUPILÂ**

v. = tutelare; incentivare (forma denominale di pupil "pupillo", dal lat. papillus "fanciullo minorene")  
**I fruts a van pupilâts ma no masse spes!**  
**I bambini vanno incentivati ma non troppo frequentemente!**

❖❖❖ **PURCJINEL**

s.m. = burattino; anche gaglioffo, malvivente  
(dal nome della maschera napoletana pulcinella, dal latino tardo pulcinus "pulcino", da pullus "pollo", da qui il senso di "persona sprovveduta, impacciata", da confrontare con purcjinele "pagliaccio, pulcinella", usato in friulano in senso spregiativo come i suoi sinonimi)  
**E à preferit lassâ Toni par chel purcjinel di Meni.**  
**Ha preferito lasciare Antonio per quel burattino di Domenico.**